

KAJIAN TENAGA KERJA 2018

SOALAN-SOALAN LAZIM

Apakah dia Kajian Tenaga Kerja (KTK)?

Kajian Tenaga Kerja (KTK) ialah satu kajian yang dikendalikan oleh Jabatan Perancangan dan Kemajuan Ekonomi (JPKE) yang meliputi keluarga-keluarga yang terpilih sahaja di seluruh negara.

Apakah tujuan kajian ini?

Kajian ini bertujuan untuk mengumpulkan maklumat yang lengkap dan terkini mengenai saiz, struktur, taburan dan ciri-ciri tenaga kerja, pekerjaan, pengangguran dan lain-lain ciri-ciri ekonomi penduduk. Maklumat berkenaan akan digunakan untuk membantu perancangan, penyelidikan, penyediaan dasar dan pengurusan tenaga kerja.

Bilakah kajian ini dijalankan?

KTK yang dijalankan ketika ini telah bermula pada 15 Oktober 2018 dan akan dijalankan selama empat minggu hingga 11 November 2018.

Keluarga saya telah terpilih bagi kajian ini tetapi jiran saya tidak terpilih. Bagaimanakah pemilihan dibuat?

Liputan bagi KTK 2018 ditentukan secara sampel sahaja. Beberapa kampung/kawasan telah dipilih di setiap daerah dan hanya sebilangan tempat kediaman dan keluarga dari kampung/kawasan tersebut akan dipilih secara rambang untuk diliputi semasa KTK 2018.

Keluarga saya telah pernah terpilih untuk kajian yang dikendalikan oleh JPKE sebelum ini. Bagaimana boleh keluarga saya terpilih lagi?

Pemilihan kampung/kawasan dan juga keluarga ditentukan secara sistematik mengikut prosedur pensampelan rambang. Oleh yang demikian, terdapat kemungkinan bagi sesebuah keluarga itu untuk terpilih sekali lagi dalam kajian seterusnya.

Bolehkah keluarga saya digantikan dengan keluarga lain?

Apabila sesebuah keluarga telah dipilih untuk kajian ini, ianya tidak boleh digantikan oleh keluarga lain. Itulah sebabnya kerjasama dari semua keluarga terpilih amat diperlukan supaya maklumat yang dikumpulkan mencapai tahap liputan dan kualiti yang telah ditetapkan untuk memberikan gambaran sebenar bagi semua keluarga di seluruh negara.

Bagaimanakah kajian ini dilaksanakan?

Sebelum bulan kajian bermula, pegawai-pegawai kajian yang dilantik telah diberikan pelbagai latihan yang berkaitan dengan KTK bagi memastikan kerja-kerja menemuduga dapat berjalan dengan lancar dan sempurna.

Sepanjang tempoh kajian, pegawai-pegawai kajian yang dilantik akan mengunjungi rumah keluarga terpilih dan seterusnya menemuduga ketua dan setiap ahli keluarga untuk mendapatkan maklumat yang diperlukan.

Bagaimanakah saya dapat memastikan pegawai kajian yang datang adalah yang dilantik oleh JPKE?

Sebagai pengesahan lantikan, setiap pegawai kajian akan membawa bersama surat lantikan masing-masing. Mereka juga akan memakai *Vest* dan Pas Pegawai Kajian KTK 2018. Awda juga boleh meminta untuk memeriksa Kad Pengenalan mereka bagi mengesahkan identiti pegawai kajian berkenaan.

Adakah maklumat saya akan dirahsiakan?

KTK 2018 dijalankan di bawah Akta Perangkaan, Bab 81 dari Undang-Undang Negara Brunei Darussalam.

Setiap pegawai kajian yang dilantik telah mengangkat sumpah untuk menyimpan segala maklumat yang diperolehi sebagai sulit dan rahsia dan tidak akan mendedahkan kepada sesiapa yang tidak berkenaan.

Hasil dari kajian ini akan dikeluarkan oleh JPKE secara agregat sahaja.

Apakah kegunaan hasil dari kajian ini?

Hasil dari kajian ini akan memberikan maklumat tenaga kerja yang lengkap dan terkini. Perbandingan dengan hasil kajian yang terdahulu akan dapat menunjukkan perubahan dalam saiz, struktur, taburan dan ciri-ciri tenaga kerja, pekerjaan dan pengangguran di negara ini.

Selain itu, hasil dari KTK juga digunakan oleh pelbagai pengguna termasuk sektor swasta, pakar akademik, para ilmuwan, penyelidik, penuntut-penuntut dan orang ramai bagi berbagai tujuan dan kegunaan masing-masing.

Jika saya mempunyai sebarang pertanyaan, siapakah yang boleh saya rujuk?

Awda boleh menghubungi pegawai-pegawai JPKE melalui talian 2230250, atau 2230265 pada waktu pejabat.

Awda boleh juga melayari laman web kami di www.depd.gov.bn atau menghubungi kami melalui e-mel: info.statistics@jpke.gov.bn.